

D.R. 23/2011

RANG UNDANG-UNDANG

b e r n a m a

Suatu Akta untuk meminda Akta Perikanan 1985.

[]

BAHAWASANYA adalah suai manfaat untuk meminda undang-undang bertulis yang berhubungan dengan perikanan di perairan perikanan Malaysia dan dengan penyu dan penangkapan ikan di sungai di Malaysia:

DAN BAHAWASANYA menurut Fasal (1) Perkara 74 Perlembagaan Persekutuan, Parlimen boleh membuat undang-undang berkenaan dengan apa-apa perkara yang disenaraikan dalam Senarai Persekutuan atau Senarai Bersama, dan bahawasanya perikanan, termasuk penangkapan ikan dan perikanan kelautan dan muara (tidak termasuk penyu), ialah suatu perkara yang disenaraikan dalam Senarai Persekutuan di bawah butiran 9 Senarai I dalam Jadual Kesembilan kepada Perlembagaan Persekutuan dan penangkapan ikan dan perikanan kelautan dan muara ialah juga perkara-perkara yang disenaraikan dalam Senarai Bersama di bawah butiran 12 Senarai IIIA Jadual Kesembilan tersebut berkenaan dengan Negeri-Negeri Sabah dan Sarawak:

DAN BAHAWASANYA melalui Fasal (1)(b) Perkara 76 Perlembagaan Persekutuan, Parlimen boleh membuat undang-undang berkenaan dengan apa-apa perkara yang disenaraikan dalam Senarai Negeri bagi maksud menggalakkan persamaan undang-undang bagi dua

Negeri atau lebih, dan bahawasanya penyu dan penangkapan ikan di sungai ialah perkara yang disenaraikan dalam Senarai Negeri di bawah butiran 12 Senarai II Jadual Kesembilan kepada Perlembagaan Persekutuan:

MAKA, OLEH YANG DEMIKIAN, INILAH **DIPERBUAT** oleh Parlimen Malaysia seperti yang berikut:

Tajuk ringkas dan permulaan kuat kuasa

1. (1) Akta ini bolehlah dinamakan Akta Perikanan (Pindaan) 2011.

(2) Akta ini mula berkuat kuasa pada tarikh yang ditetapkan oleh Menteri melalui pemberitahuan dalam *Warta*.

Pindaan seksyen 40

2. Akta Perikanan 1985 [*Akta 317*] dipinda dalam seksyen 40 dengan memasukkan selepas subseksyen (2) subseksyen yang berikut:

“(3) Walau apa pun subseksyen (1) dan (2), permit untuk mengimport atau mengeksport apa-apa ikan hidup hendaklah dikeluarkan oleh Ketua Pengarah Kuarantin dan Pemeriksaan mengikut Akta Perkhidmatan Kuarantin dan Pemeriksaan Malaysia 2011 [*Akta*].

(4) Mana-mana orang yang mengimport atau mengeksport apa-apa ikan hidup tanpa permit yang dikeluarkan oleh Ketua Pengarah Kuarantin dan Pemeriksaan melakukan suatu kesalahan di bawah Akta Perkhidmatan Kuarantin dan Pemeriksaan Malaysia 2011.

(5) Suatu permohonan bagi permit untuk mengimport dan mengeksport apa-apa ikan hidup hendaklah dibuat mengikut Akta Perkhidmatan Kuarantin dan Pemeriksaan Malaysia 2011.

(6) Penguatkuasaan berhubung dengan ikan hidup di pintu masuk, stesen kuarantin dan premis kuarantin hendaklah dijalankan oleh pegawai penguat kuasa yang dilantik di bawah Akta Perkhidmatan Kuarantin dan Pemeriksaan Malaysia 2011 mengikut kuasa di bawah Akta itu.

(7) Bagi maksud seksyen ini, “pintu masuk”, “stesen kuarantin” dan “premis kuarantin” hendaklah mempunyai erti yang sama yang diberikan kepada ungkapan itu dalam Akta Perkhidmatan Kuarantin dan Pemeriksaan Malaysia 2011.”.

Kecualian

3. Apa-apa perkara yang berhubungan dengan permohonan bagi dan pengeluaran permit untuk mengimport dan mengeksport apa-apa ikan hidup yang belum selesai sebelum tarikh permulaan kuat kuasa Akta ini tidaklah terjejas oleh Akta ini dan hendaklah diteruskan seolah-olah Akta ini tidak diperbuat.

HURAIAN

Rang Undang-Undang ini bertujuan untuk meminda Akta Perikanan 1985 (“Akta 317”).

2. *Fasal 2* bertujuan untuk meminda seksyen 40 Akta 317 dengan kemasukan subseksyen baru (3) hingga (7). Subseksyen ini bertujuan untuk memberi Ketua Pengarah Kuarantin dan Pemeriksaan kuasa untuk mengeluarkan permit untuk mengimport dan mengeksport ikan hidup mengikut Akta Perkhidmatan Kuarantin dan Pemeriksaan Malaysia 2011 [*Akta*]. Menjadi suatu kesalahan bagi mana-mana orang untuk mengimport atau mengeksport ikan hidup tanpa permit yang dikeluarkan oleh Ketua Pengarah Kuarantin dan Pemeriksaan.

Subseksyen ini juga bertujuan untuk memperuntukkan bahawa permohonan bagi permit untuk mengimport dan mengeksport ikan hidup hendaklah mengikut Akta Perkhidmatan Kuarantin dan Pemeriksaan Malaysia 2011. Selanjutnya, penguatkuasaan berhubung dengan ikan hidup hendaklah dijalankan oleh pegawai penguat kuasa yang dilantik di bawah Akta Perkhidmatan Kuarantin dan Pemeriksaan Malaysia 2011. Walau bagaimanapun, kuasa penguatkuasaan ini adalah terhad kepada pintu masuk, stesen kuarantin dan premis kuarantin sahaja dan hendaklah dijalankan mengikut Akta Perkhidmatan Kuarantin dan Pemeriksaan Malaysia 2011.

3. *Fasal 3* bertujuan untuk mengadakan peruntukan kecualian.

IMPLIKASI KEWANGAN

Rang Undang-Undang ini tidak akan melibatkan Kerajaan dalam apa-apa perbelanjaan wang tambahan.